

Predeliberà la revisiun da la lescha da scola

■ **(cc) La cumissiun dal cussegl grond per furmaziun e cultura ha pre-deliberà la missiva da la regenza tar la revisiun totala da la lescha davart las scolas popularas dal chantun Grischun (lescha da scola). Cun intginas propostas divergentas recumonda ella al cussegl grond d'acceptar il project.** Cun la missiva tar la revisiun totala da la lescha da scola propona la regenza grischuna da repassar en moda cum-plessiva il cuntegn e la furma da la lescha vertenta. Uschia duai vegnir stgaf-fida ina basa, cun la quala la scola populara dal Grischun po far frunt a sfidas futuras conform al temp ed a la situa-zion. La cumissiun dal cussegl grond per furmaziun e cultura ha pre-deliberà il project sut il presidi da la deputada *Sandra Locher Benguerel* ed en preschientscha dal cusseglier guvernativ *Martin Jäger* en totalmain 10 sesidas per mauns dal cussegl grond. Ella ha pudì

sa persvader da las finamiras menziunadas: Integraziun da la lescha da scolina en la lescha da scola sco er dal sectur che pertutga la pedagogia speziala da la lescha d'impedids en la lescha da scola; mesiras integrativas da la pedagogia speziala; garanzia d'ina instrucziun nuninterrutta l'avantmezdi cun agid d'uras da bloc per la scolina e per la scola primara; ina purschida da structuradas dal di conforma al basegn, sch'i dat ina dumonda correspudenta; in augment dal pensum d'instrucziun da 38 a 39 emnas da scola per onn, da maniera ch'il dumber d'uras d'instrucziun per emna sa sbassa, sco er in augment dals salaris inizials per las personas d'instrucziun. La cumissiun è entrada unanimamain en il project perquai ch'il basegn d'agir è cumprovà e perquai che la missiva tegna quint da quest basegn d'agir.

Igl è er impurtant da menziunar ch'il project mantegna quai ch'è sa cumpro-

và, sco en spezial il fatg che la scolina è facultativa e che la scola cumenza a la vegliadetgna da 7 onns. La scola populara resta vinavant ina incumbensa comunabla dal chantun e da las vischnancas.

Auzar il stgalim da salari suprem

Suenter lungas ed intensivassas debattas è la cumissiun suandada per gronda part la missiva. Igl è dentant er vegnidas fatgas propostas materials divergentas. Per l'ina concernent in augment dals salaris da las personas d'instrucziun che surpassass la missiva cun augmentar il stgalim da salari suprem. En questa fatschenta pretenda ina maioritad da la cumissiun 154 pertschient da la tariffa da l'emprim stgalim da salari ed ina minoritad da la cumissiun 150 pertschient (proposta da la missiva: 142 pertschient). Per l'autra propona ina maioritad da la cumissiun da reducir la gron-

dezza da las classes a maximalmain 22 scolaras e scolaras (proposta da la regenza: maximalmain 24), ed ina minoritad da la cumissiun propona da dar ina facilitaziun da vegliadetgna a las personas d'instrucziun tenor il dretg vertent. In'ulteriura minoritad da la cumissiun vulesch declerar la scolina per obligatoria. Plinavant beneventa la cumissiun la proposta da la Rumantschia concernent ils cudeschs da scola e fa ina proposta respectiva al cussegl grond. Tenor la proposta pon meds d'instrucziun en rumantsch vegnir edids tant en rumantsch grischun sco er en ils idioms. Ina maioritad da la cumissiun vulesch dar dapli paisa a la direcziun da la scola tras ina formulaziun reglamentara («per regla») en la lescha (proposta da la regenza: formulaziun da natira facultativa [«po»]). Dal rest propona la cumissiun anc intginas paucas adattaziuns da natira formala.

Las novaziuns che vegnan deliberadas tras la missiva da la regenza chaschunan custs nets supplementars da totalmain circa 4,5 milliuns francs per onn. Da quels surpiglia il chantun circa 2 milliuns francs e las vischnancas cun lur instituziuns ch'èn responsablas per la scola circa 2,5 milliuns francs. Ulteriurs custs supplementars resultassan sche las propostas menziunadas concernent la salarisaziun da las personas d'instrucziun e concernent la grondezza da la classe vegnissan acceptadas dal cussegl grond. Per surpigliar ils custs supplementars propona ina maioritad da la cumissiun ina clav da repartiziun da 60% sin donn e cust dal chantun e da 40% sin donn e cust da las vischnancas, ina minoritad da la cumissiun propona da repartir ils custs supplementars mez per in al chantun ed a las vischnancas.

Il cussegl grond vegn a tractar il project en la proxima sessiun da december.